

東
華
續
錄

東華續錄

同治七十六

臣王先謙敬編

臣張式恭恭校

同治八年己巳春正月癸酉朔元旦節停止筵宴○丙子廣河南桐柏縣學額一名○予貴州殉難通判汪慶增祭葬世職○丁丑諭軍機大臣等曾璧光奏籌議緩裁援黔湘軍並請飭湖南廣西催派各軍會剿一摺黔省自收復龍貴都勻等處後設防愈寬上游各匪尙須剿辦林從太駐師勻城兵練無多僅能支持一面黔事見多可乘之機自未便將援黔湘軍遽行裁減前據劉崐奏湘軍攻克天柱縣城已飭席寶田等軍分道前進刻下潯陽江以北苗教各匪未平卽著劉崐迅催席寶田等統帶新舊各部由鎮遠施秉舊日驛路攻剿而上與川軍會合分別剿撫以期東面肅清

其都勻麻哈新復各城及獨山荔波一帶均近廣西著蘇鳳文嚴飭派出之孔憲隆等軍剋期馳赴與川楚黔各軍分路雕剿將潯南苗務早日辦竣不准意存觀望至黔省收復地方殘破已極其安插降眾招集流亡及一切善後各事宜曾璧光務須振刷精神妥籌布置毋藉口於餉絀兵單致多貽誤將此由五百里各諭令知之○官軍復貴州長寨廳城○戊寅諭軍機大臣等岑毓英奏攻克富民縣城分兵援應各營一摺岑毓英自克復澂江後卽將該處餘匪搜殺斬馘逆回馬葵等內患已清正擬分兵攻擊附省逆壘而武定逆匪分竄新興嵩尋應援各賊田仲興在新興極力抵禦幸未疏虞惟尋甸援賊萬餘勢甚喫緊若不併力剿洗則嵩明尋甸二城不能速拔防勦各軍俱爲賊所牽掣劉嶽昭見已親赴尋甸督戰獲勝岑毓英復派員克復富民斷賊咽喉要地正可

乘此聲勢會督諸軍合力截擊毋令死灰復燃著劉嶽昭岑毓英相機勦辦迅掃逆氛尋甸賊糧缺乏勢難久踞富民既克嵩尋逆匪已無路可歸惟賊匪尙有三萬餘恐其奪路狂奔又成滋蔓著岑毓英嚴飭李維述固守廠口防賊衝突並飭張保和等嚴扼富民各要隘毋稍疏失該縣善後事宜尤應妥爲籌辦以定人心其新興軍務岑毓英已派王正坤等前往助勦著卽飭令會同田仲興迅將州城恢復毋得曠日持久省外逆壘仍著該撫次第掃蕩以孤賊勢而解城圍岑毓英另片奏胞弟岑毓寶援勦出力可否給予獎勵等語同知岑毓寶著以知府用嗣後續有勞績著咨明劉嶽昭奏請獎敘將此由五百里各諭令知之○己卯諭軍機大臣等穆圖善奏回匪竄擾南路州縣籌辦防勦一摺陝回由渭河偷渡闖入秦州清水秦安地面勾結附近游匪肆出滋擾且與董

志原賊巢相距甚近省城黃河狄道洮河正在結冰之際設竟踰冰直渡則到處滋蔓勢成燎原省垣空虛大局尤爲可慮穆圖善見飭前敵各軍扼要分紮相機進擣三甲集作步步爲營之計一面單騎旋省籌備芻糧整理附省各營以防河州東南鄉回匪渡冰東竄卽著嚴檄各將士將竄甘陝回迅圖攻擊力解秦安之圍並飛咨駐陝各路官軍一併設法截剿毋得推諉觀望貽誤事機穆圖善將省防布置穩固仍須出省督師以期調度較靈金順見在榆林勦辦陝西北路竄匪正在得手之際勢難抽調回甘穆圖善仍須就見有兵力認真激勵以資攻剿將此由五百里諭令知之○諭定安桂成奏豫軍追剿河西竄匪疊勝成祿奏請飭催指撥銀兩各摺片張曜一軍在十里長灘擊賊獲勝後卽由烏蘭布拉一帶向北進剿行至達拉特旗地方賊眾列隊抗拒經張曜督

軍縱擊馬步各賊紛紛敗竄乘勝由小古城一路西進連踣賊踞村莊三十餘處斬獲甚夥敗匪復敢糾合騎賊數千回撲各營併力勦擊擒斬悍匪賊目多名餘賊均向西南逃竄河西及準噶爾貝子境內均無賊蹤勦辦甚爲得手見在此股賊匪窮蹙已極亟應乘此聲威盡力追勦著定安桂成催令達爾濟烏爾圖那遜各隊與張曜所部互相聯絡三面環擊務將此股醜類聚而殲旃毋令回竄沿河一帶防兵仍當實力堵禦不可因賊蹤較遠稍涉鬆懈著定安等知照杜嘎爾飛飭馬陞認真防範以免疏虞並著鄭敦謹隨時妥籌兼顧前因成祿軍營餉缺曾令戶部於湖北山西河東欠解新疆協餉項下指撥該軍餉銀一二十萬兩山西河東應解指撥成祿軍營餉項著鄭敦謹趕緊措解務於春間解到成祿軍營以應急需將此由五百里各諭令知之○諭成祿奏肅軍

連日攻勦請於凱撤各軍內挑撥馬步西征擬派道員辦理轉運各摺片肅州東北兩面及南面甫經官軍圍攻旋因南山扁都口回股出竄硤口等處疊陷我軍失利成祿勦辦肅州逆匪日久無功似此逡巡畏縮軍務尙有了期耶著成祿會合諸軍實力進勦將肅城迅圖克復以期振旅出關毋再託故遲延自干罪戾歸化城距肅州相去甚遠若在該處設局轉運程途紆折一切諸多掣肘所請令歸綏道興奎辦理後路轉運之處著毋庸議直東凱撤各軍左宗棠各營見已回秦勦匪李鴻章所部亦尙畱防各路一時均難抽調況成祿軍營餉項本屬不敷豈可再添兵勇該提督當就見有兵力節節堵蕩迅殄逆氛前因營勇潰變經成祿將王仁和等奏參當降旨將王仁和革職仍畱署任王禮和發往新疆又據穆圖善奏稱王仁和統率無方不勝重任復降旨將王仁和

毋庸再畱署任撤去統領該革員等情節較重成祿將「字一」
軍仍令王仁和統帶王禮和暫緩赴戍畱於軍營之「均」不准行
將此由六百里諭令知之○庚辰廣山東博山縣學額二名○辛
巳以孟春時享 太廟 上前期親詣行禮○諭軍機大臣等崇
實吳棠奏官軍進攻吡牛壩夷匪部落投誠建南一律肅清一摺
建南夷匪煽亂十餘年久爲川省邊境之患經崇實奏派周達武
征剿疊勝此次進攻吡牛壩羣夷畏服乞降責令呈繳軍器放還
難民回軍越備修砌建堡用資保障卽著崇實等檄飭該提督會
同該地方文武將善後事宜詳細規畫務期亂萌永戢以固邊陲
將此由五百里各諭令知之○諭崇實等奏西陽民教仇殺兇飭
查辦一摺四川西陽州教民龍秀元倡勒朱永泰退婚並掠財焚
屋該州團民激於公憤焚毀教堂燒斃司鐸李國安及教民多人

是此案起釁由於教民龍秀元而據主教范若瑟陳稱則該州團民有擄殺教民九家及燒毀教堂傷斃教民百餘人之多情節不甚相同酉陽地處邊隅民情强悍民教各執一詞必致互相尋釁著崇實吳棠飭令川東道會督該州文武持平辦理庶可折服民教之心斷不可稍有偏重致滋事端署任知州胡圻先事未能駕馭臨事又不能彈壓著暫行革職畱於地方協緝首先滋事之犯以贖前愆將此由五百里諭令知之○壬午諭軍機大臣等劉崐奏彙報勦撫苗寨情形見分路進剿一摺貴州清江廳屬苗寨林立大爲楚黔邊害席寶田正擬督兵次第埽蕩而稟雍等寨苗匪竟敢糾黨圍攻巴治席寶田派令榮維善等往援匪眾解圍遁走乘勝攻拔稟雍六甫柳羅烏包等寨敗匪麇集者磨恃眾抗拒官兵軍槍礮轟擊賊始敗潰統計殺賊五六千名並收撫耶磨平夏高

邱白兜等寨清江北岸苗寨悉就蕩平勦辦極爲得手席寶田見已派令戈鑑李金榜進勦古州李光燦清查天柱土匪後會師清江黃潤昌率同鄧子垣進規鎮遠彭芝亮俟兩路進兵卽行規取施秉是楚省援黔諸軍正圖大舉深入曾璧光當乘此聲勢飭令黔省帶兵員弁與楚軍協力雕勦迅掃逆氛早清疆圉並著劉崐嚴檄清鎮各營併力勦洗毋稍鬆懈一面催令席寶田迅督所部直攻施洞口諸苗潰其腹心免致該逆四出滋擾此次出力各員弁著劉崐存記俟清江廳城克復後併案保獎將此由五百里各諭令知之○甲申諭軍機大臣等都興阿奏拏獲邊外滋事各犯並仍飭緝逃匪一摺蒙古台吉托克托虎勾結匪徒宋四閭王等以防程廣學復仇爲名藉肆訛搶前經諭令都興阿等嚴拏茲據該將軍奏稱遵派副都統德昌等督帶兵勇會同賓圖王旗擒獲

托克托虎並首匪楊四催等二十餘名分別保候解省審辦復續獲宋四閭王之姪宋七十其兄宋義一併研訊卽著都興阿先將解到各犯逐一嚴訊務得起釁確情按律定擬毋稍寬縱托克托虎藉詞復仇殺斃民人韓成福家二十八命兇惡已極尤須嚴切研鞫並有無另案訛搶商民情事從重懲治保候之蒙古特各喜巴彥等如有應行質訊之處著卽提省歸案毋任疏脫在逃之宋英卽宋四閭王程廣學等仍著都興阿富明阿嚴密搜捕並著理藩院傳知賓圖王旗及附近各王旗一體躡緝務獲究辦以淨根株另片奏請將獲犯出力將弁獎勵等語副都統德昌總兵張德祿所部弁兵內著准其擇尤酌保毋許冒濫將此諭知理藩院並由五百里諭令都興阿富明阿知之尋都興阿奏見經拏獲逸犯藍泳碌及韓成幅之子韓甸偉等到案訊明托克托虎與韓甸偉

因細故積恨仇殺互傷多命藍泳碌幫同拒捕致傷弁勇均屬兇惡除楊四催業經病故托克托虎韓甸偉藍泳碌應請先行正法宋七十等訊不知情應卽省釋在逃各犯俟獲另結從之○諭瑞麟奏見派鎮道大員馳赴潮州辦理搶擄械關各案一摺廣東潮州府屬素有搶擄械關之案經瑞麟督飭藩臬出示曉諭各屬械關稍知斂迹而匪類仍未捆交該督因派總兵方耀道員文星瑞帶兵先赴惠州所屬之陸豐再赴潮郡相機辦理自係爲整頓地方起見但潮郡民風素稱强悍而各省撤回勇丁尤爲兇橫若辦理不得其宜恐能發而不能收其患不可勝言瑞麟既歷經詳詢諒必深知竅要而李福泰曾任惠潮嘉道於該處民風地利自當熟悉卽著妥籌機宜飭令方耀等嚴申軍律相機辦理俾潮郡良民無稍擾累匪徒知所警惕將搶擄各兇犯交出懲辦以遏亂萌

仍不可一味逞威激成變故另片奏鶴山曹冲土匪客民滋事見派兵妥辦等語鶴山客民聚眾數千突入高明縣境肆擾瑞麟見飭總兵鄭紹忠帶兵勇前往辦理其東莞新安土匪潛匿曹冲附近之長沙地方肆行剽掠瑞麟調水師輪船前往圍拏辦理俱尙妥協卽著瑞麟等飭令鄭紹忠等分別妥辦迅速肅事不可稍涉遷延將此由五百里各諭令知之○論麟興等奏布倫托海請調哈密援兵先將大概情形豫爲籌畫一摺前因福濟錫綸奏叛民變亂亟圖進剿疊諭文麟於哈密撥出兵勇一千名迅速赴援茲據該將軍等奏稱此項兵勇由哈密至巴里坤繞道烏科再至布倫托海沿途行走維難各臺站應付不及見在索倫等眾三千四百餘名已抵雅爾玉爾地方該人眾素稱勁旅若就近調用較之遠調哈勇尤爲便捷等語布倫托海距雅爾玉爾由間道僅有十

餘站轉瞬春深凍解道路自利進行惟該人眾辛苦餘生未及休息卽令其荷戈從戎能否得力哈密兵勇遠來旣屬不易而該人眾尙有數千亦未便任其棄置著麟興錦丕勒多爾濟榮全福濟錫綸彼此熟商不必各存成見如該人眾略加訓練可以調用卽著福濟錫綸咨明文麟將前調兵勇暫爲停撥如仍須哈兵前來其添設臺站及應付口糧各事宜該大臣等尤當先行籌畫毋誤師行索倫人眾到後無論調用與否應於何地安插俾無失所之處麟興等務須妥籌辦理將此由五百里各諭令知之○乙酉諭軍機大臣等鄭敦謹奏沿河賊匪被擊西竄並剿賊續勝情形一摺山西北路一帶地方屢有陝回窺伺河干希圖東犯經張曜馬陞等督軍迎剿斬馘甚多前經定安奏到曾降旨令該將軍等飭知達爾濟烏爾圖遜會同張曜所部相機追剿卽著仍遵前旨乘

此得手之際奮力勦辦毋任逃逸其中路永和大甯吉州各處復經已革臬司陳湜率勇過河與副將何鳴高李運春等分路追勦疊獲勝仗百里以內已無匪蹤春氣融和河冰漸泮自可較有把握第賊情詭譎不可因其遠竄稍涉疏懈仍著鄭敦謹督飭陳湜等嚴密防剿以保完善之區宋慶一軍擬由神木趨赴防所著催令前進與張曜等軍聯絡一氣用資堵遏將此由六百里各諭令知之○戊子諭軍機大臣等瑞麟奏勦辦高明客匪平靖見飭軍按捕鶴山餘匪一摺廣東鶴山客民潛糾高廉等府遣散客眾竄入高明縣境占踞村莊經瑞麟派令總兵鄭紹忠等帶兵往捕該匪猶敢在石圭嶺等院抗拒官軍鄭紹忠等分投追殺復由三峯四偏攻餘匪由鶴山之石門四堡各村逃逸其主謀之客紳郭大猷等四名並經拏獲解省高明境內被占村莊見已一律收回勦

辦尙爲妥速鶴山石門四堡一帶客籍甚多該匪向彼處紛逃難保不復圖糾合仍著瑞麟檄飭鄭紹忠督軍前往勒令該地客紳將逃出滋事各匪逐一交官剋期辦結毋任再滋事端所有高明鶴山交匪清田各事宜並著該督會同李福泰督飭道員齊世熙及鄭紹忠等悉心經理務使土客相安以消後患東莞新安等處土匪該督等當懷遵前旨迅飭鄭紹忠等分別妥辦毋稍遷延將此由五百里各諭令知之○已丑諭軍機大臣等曾國藩奏略陳直隸應辦事宜請調軍駐守並飭江蘇酌撥銀兩一摺直隸練兵治河俱關緊要曾國藩擬練兵二萬有奇自屬防患未形但急切未能奏效劉銘傳一軍萬餘人見駐張秋素稱得力卽著李鴻章飭知該軍長作拱衛畿輔之師所需餉項仍由江南撥解將來該軍應否調赴北路或分紮直東之交並著聽候曾國藩酌辦永定

河歲修銀兩未能足數而練兵之餉亦須豫籌直隸藩庫款項支絀異常自應酌撥餉項以資應用著馬新貽丁日昌按月籌解銀三萬兩毋得稍有短絀以重畿疆將此由五百里各諭令知之○停止粵鹽運滇飭瑞麟撥銀二十萬兩充劉嶽昭軍餉○庚寅左宗棠奏署綏德州知州成定康等稟報十一月二十七日進勦清澗之賊師次石觜驛訶知駱駝鋪柏樹坵樓子塔王家溝一帶均有大股盤踞成定康軍至駱駝鋪賊已分踞郝家山一帶排陣來迎成定康令營官鄧萬盛李占榮等先伏於柳莊山之旁以防鈔襲之賊乃三路鼓行而前賊從郝家山一齊擁出柏樹坵樓子塔王家溝之賊亦皆繼擁而至勢殊驕甚成定康令營官殷忠廷戴光明各率所部當左右兩路而自率喻先恕及馬隊當中路忽騎賊數百躍馬橫戈從柳莊山口而出爲鄧萬盛李占榮等伏兵所

敗賊爲奪氣官軍知其餒也遽前薄之哨長周克齊首先踏陣喻
先恕繼之殷忠廷戴光明左右銳進賊不能支紛紛敗潰追殺三
十餘里斃賊千餘名救出難民數百而清澗北境各處之賊均向
老君殿一帶奔竄成定康收隊馳抵清澗縣城時已二鼓矣知縣
趙聿灝請勦西南清澗峪原家溝踞賊適劉厚基所部後營營官
知縣梁以恭已馳抵縣城二十八日梁以恭追賊老張坵賊已遠
颺僅斬其斷後騎賊百數十名而還成定康旋即收隊回城戌刻
探報縣東李家寨周家圪塆高家嶺一帶自賊數千攻民寨甚急
成定康令各營募食潛師擊之二十九日午刻馳抵麻子圪距李
家岔約四五里偵賊方撲李家寨成定康令梁以恭由左殷忠廷
繼之喻先恕由右鄧萬盛李占榮繼之親率戴光明爲中路馬隊
繼之行甫二里馬步賊數千紛來抗拒中路官軍悉銳奮擊正酣

戰間右路已由槐黃峪截出賊潰走高腰坵成定康飭李長樂領馬隊衝殺步隊分路兜剿賊屍枕藉左路方進周家圪塆適賊由後鈔襲梁以恭回旗力拒殷忠廷飭所部分左右翼鈔之賊潰走高山嶺官軍三路會合窮追十餘里斃賊數百名生擒百餘名此成定康勦清澗股匪獲勝情形也劉松山全軍馳抵山西永甯州調知賊眾聚擾榆林東北晉軍扼之東岸而豫軍記名提督張曜已馳抵河曲料北路可以無虞乃急購行糧爲渡河擊賊計十二月初三日前隊渡河抵綏德州畱所部三千人於山西之軍渡地方防東岸初六日率所部馬步馳抵綏德州城晤商成定康以賊擾榆林其大股麇聚榆林西南懷遠縣之小理川大理川以及安定保安寨靖邊一帶必不料官軍由山西兜剿而西也宜及其卒不及備直擣各股老巢庶榆林邊內邊外各賊急於回顧而榆

林及歸綏可以解嚴初八日劉松山率所部由綏德州西行繞北路岔把溝自北而南成定康由州西七十里大理川自南而北會師夾擊是夜劉松山行至吳家山調北路無賊賊巢在小理川之南大理川之北縱橫二十餘里劉松山飭提督易德麟率前軍蘇松鎮總兵章合才率左軍並馬隊前營右營先攻大理川西續家灣一帶賊巢兼扼其竄西北之路劉松山俟其拔行十餘里後親率中軍及馬隊中營後營由右進飭提督蕭章開率右軍由左直撲小理川一帶賊巢甫行二十里賊已驚覺紛紛出巢抗拒排列十餘山氣殊驕甚劉松山飭各軍奮威衝殺賊不能支奪路狂竄官軍乘勝壓擊立將小理川店子寺一帶賊巢二十餘處一律掃蕩賊向山南大理川周家嶺而竄騎賊數百不能越山沿小理川西遁中後兩營馬隊追及殲之官軍追近周家嶺數里沿途賊屍

枕藉敗賊見官軍緊逼不敢入周家嶺老巢而巢中羣賊競出村
排隊抗拒劉松山分步隊兩枝由左路一枝由右路一枝爲後拒
馬隊從右路之右斜鈔而出正布陣間賊呼躍而前搦戰甚急官
軍靜以待之少頃鼓聲起三路殺入賊遂大敗棄巢而竄附近各
賊見周家嶺大巢已傾不戰自潰時則新月初升官軍分路追逐
數里沿途擒斬無算是日成定康由三皇峯進午刻行抵樓兒砭
見賊壘數座橫踞道旁成定康飭各營更番迭進不遽猛撲意俟
劉松山攻破周家嶺庶賊無所歸可多殺也未正總兵喻先恕副
將戴光明參將張德榮遊擊殷忠廷易培文成景星鄧萬盛都司
古楚南李志剛李占榮守備余發勝把總李長樂同知陳瑞芝各
率銳卒仰攻火器環轟賊膽落官軍乘勢奮躍先登連破十餘
壘殺賊無算復擣三眼泉劉家坪一帶卡壘破之追八九里適劉

松山已連踏賊壘破周家嶺大集而來兩軍會合縱擊賊更披靡窮追西南六七里始令收隊是夜五鼓易德麟章合才適由大理川西續家灣一帶埽蕩而來踏平賊壘二十餘處殄斬亦多計是役共破賊壘百十餘處斃賊五六千名生擒三千餘名解散脅從二萬有奇此十二月初九日劉松山成定康兩軍大破綏德懷遠各處賊巢實在情形也初十日劉松山成定康派隊搜山均有擒斬是夜三鼓劉松山飭易德麟章合才率前左兩軍及右後兩營馬隊向西南追勦自率中軍與蕭章開所部右軍及中前兩營馬隊會合成定康一軍分兩路西追行六十里卽與大股賊遇劉松山商令成定康由右路自率所部步軍出左路馬隊出左路之左相機鈔襲賊見官軍驟至駭而奔僅畱悍賊殿後官軍乘勢蹙之悍賊亦奔蹶追二十里及之南岔路狹溝深賊擁擠不前官軍數

面縱擊登時擒斬千餘名其越山潰走者尙數千又追十餘里沿途擒斬無數是夜各軍就地安紮二更時成定康向西繞北而進劉松山率蕭章開及馬隊向西進行三十餘里見小理溝火光長約數十里劉松山因溝狹山高不便列隊飭蕭章開右軍先進親率中軍繼之馬隊居後魚貫而行獲賊探數名訊知賊畏勦甚前隊已行後股待發蕭章開卽分兩路沿溝而進時曉日東昇瞥覩前途賊眾擁擠聞官軍號聲遽行返撲蕭章開率所部奮勇衝殺斃殿後悍賊甚多賊悉潰走蕭章開急躡之其循左路岔溝奔竄者約一二千名劉松山麾中軍擊之擒斬殆盡其右路竄去者經成定康緊追擒斬甚眾亦鮮脫者惟越山逃逸者約七八千均向西路狂奔而去十三日卯刻劉松山率馬步各軍急追行五十里許復遇敗賊且追且擊賊狂奔不止追二十餘里忽遇成定康軍

至截其去路賊向西南狂竄兩軍夾擊其紛向西北下溝者經成
定康截殺殆盡其向西南竄去者劉松山截殺至李家岔沿途斃
賊一千數百名拔出難民數千收隊時已初更矣旋晤易德麟章
合才據稱十一日馳至宋家坪探報距營四十里玉梯山一帶有
賊盤踞是夜分路襲之埽平賊巢二十餘處賊向西南分竄易德
麟章合才及馬隊會合猛追賊狂奔不止道右一村頗大踞賊約
七八百未及竄走官軍分兩營圍之賊目鄭有才出降官軍一面
受降一面躡蹤進剿又追二十餘里沿途斃賊二千有奇生擒近
千拔出老少男婦不下數千時已午正易德麟章合才令頓隊少
憩傳餐未刻又整隊繼進行十餘里將近瓦窯堡巨巢敗賊正在
造飯聚隊不虞官軍復至也倉忙出竄易德麟等飭馬隊從堡兩
旁鈔出步隊分數起截殺將賊衝爲數段賊屍遍野又追二十餘

里至樂家坪時已二鼓矣十三日復追至南川僅截殺尾賊數百餘賊已向西南散竄易德麟等因裹糧已罄不能再追遂收隊回安定縣就辦行糧通計劉松山所部全軍及成定康一軍上臘十一一二十三等日殺賊萬餘生擒賊匪約五千有奇內有大小頭目四五十名因日夜追剿奔馳均於陣前正法未遑研訊也奪獲戰馬騾驢四千五百餘匹器械無算拔出難民以數萬計劉松山全軍僅陣亡弁丁十五名受傷二十七名成定康一軍僅陣亡五名有哨長藍翎把總杜宗太一名受傷將弁勇丁二十九名而已成定康以綏德州職守攸羈而所屬米脂有股匪攻撲堡寨遂稟商劉松山撤隊回州劉松山以竄擾草地及榆林邊內外之賊係逆首董幅祥黨夥而老巢則在靖邊由榆林至靖邊一帶賊巢林立官軍由綏德州西北西南迅掃而前已有大蛇中斷之勢若引

軍而西節節按剿則榆林內外之賊必急於回顧而東北一帶河防自可解嚴特邊牆內外被賊擾掠已久商旅不通前路無可因之糧就地無可移之粟而各軍所持行糧又已告罄裹帶無資殊深焦灼十四日屯軍安定僅獲粟米六千餘斤卽宰所獲騾驢雜資充食是夜三鼓率各軍向西北進行五十里適遣充鄉導之降卒飛報敗殘首逆李雙良高萬全率其黨亦向西北竄走見與官軍僅隔胡家山一山劉松山卽令易德麟蕭章開各率所部前左兩軍立由右進小川繞出賊北截之右後兩營馬隊護其輜重俟兩軍拔行半時許劉松山自率中軍章合才率左軍分路西進橫擊之踰胡家山而西聞槍礮聲緊知易德麟蕭章開兩軍已接仗矣劉松山麾下左兩軍急進賊見官軍馳至駭而奔官軍蹙追至小李莊截賊數段兩路沿途擒斬約千餘名拔出難民數千名收

隊回胡家山尋訪土人知小李莊之北四十里爲隆腰鎮鎮西北爲黑牛川邱家坪兩處相距二十里三巢皆賊首董幅祥之黨也是夜四鼓劉松山率各軍疾進十五日辰刻馳抵隆腰鎮賊已於先夕初更遁合黑牛川邱家坪兩巢矣劉松山親率易德麟由右向邱家坪先進飭章合才蕭章開遲半時許率所部由左以向黑牛川蓋邱家坪較黑牛川遠十餘里欲其取齊會剿也劉松山兩軍行三十餘里甫近邱家坪賊卡賊已列隊出拒左右兩山有賊如林旗械亦整劉松山飭易德麟分其軍爲兩左右攀踏擊兩山之賊而自率中軍分前後隊直撲賊卡偏卡里許揚旗吹號蹙之時左右兩路亦均搶上半山三路槍礮齊轟聲震山谷賊乍覩軍威惶駭殊甚礮止煙銷見賊陣已動急起乘之立將邱家坪賊巢攻破乘勢猛追八里許沿途又埽賊巢十餘處適章合才蕭章開

亦破黑牛川馬營灣一帶賊巢十餘處而來兩股敗賊已歸併一路官軍排追數里沿途賊屍駢列計共斃賊千五六百名解散脅從數千名敗賊竄逸鎮靖堡官軍二鼓收隊點驗勇丁陣亡三名受傷十二名而已是夜提訊陣擒賊目孔幅興呂萬源朱有祥李益昭周其慶李元幅何良如等均供鎮靖堡堅固董幅祥恃爲巢穴其眷屬則竊踞靖邊縣城訊畢斬之劉松山擬次日進攻鎮靖堡逕擄賊巢待榆邊賊還救而傾之尙未接其續報則師行日遠北山之北驛路處處梗阻軍報須從榆綏賁遞山西乃達西安也臣等竊維榆延北境橫抵甯夏正當河套迤南古爲用兵之地自陝回倡亂甘回繼之環慶平涼民人自相團結以與回鬪喪敗之餘流爲盜賊情實可原董幅祥高二屠彰之徒阻兵多年官軍未遑征討浸假而失業無賴之徒附之浸假而飢軍潰卒附之旋

又句結甘回蘇阿渾等助逆馴致戕官踞城潛圖遠竄而罪乃不可赦矣上年扈彰畏罪輸誠投臣典營次求撫臣典受之爲之安插延安其黨之散附高逆者不少故高逆一股多至十餘萬眾以兼有扈彰之黨也此次劉松山成定康所剿者高逆巨股其漏遺者實已不過數千其大小頭目殲除殆盡頃接延安守將劉厚基刑部主事周瑞松報十二月二十四日李雙良高萬全南竄距延安五十餘里之人和寨不過騎賊數百步賊數千經劉厚基周瑞松派隊截剿復斃賊數百名生擒三十餘名其窮蹙可想臣等前接成定康稟報李雙良乞撫曾允其分別安插不意其猶豫不決自取殲滅也劉松山全軍抵永甯時知北路榆郡一帶兵力漸厚遂決計渡河西剿直搗賊巢竭六晝夜之力轉戰七百餘里實有勁風掃箐之勢計共擒斬數萬拔出難民數萬奪獲戰馬騾驢七

千有奇軍械山積洵足伸 天討而快人心十五六兩日劉松山
所勦之賊卽董幅祥悍黨計董逆聞大軍深入必急於回救榆邊
內外自可解嚴而春令漸深河冰待泮晉防或可無虞其於大局
實有神益惟師行既遠裹糧告罄臣等雖籌銀委員在山西永甯
採運軍食而距該軍數百里轉饋不前所慮不在賊多而在糧運
不繼雖聞大捷仍不免有喜而憂陝甘軍務較難於各省將士苦
況較甚於各省者此也又奏北路榆林邊境之賊東窺河干北侵
草地均首逆董幅祥嗾之董幅祥寄其孥於靖邊而率其醜類四
出剽掠較李雙良爲狡上年十二月初四日記名提督張曜飭前
起各營官總兵王連三遊擊王明泰提督楊春祥副將徐效孟於
是夜二鼓由河曲履冰渡河先攻法寺胡灣之賊斃賊三四百名
楊春祥追至古城子復斃賊百餘名獲馬二百餘匹初六初八等

日楊春祥等擊石界子各處騎賊均有擒斬張曜令王連三等進駐五拉合蘇自率所部渡河會剿十三日副都統金順延綏鎮總兵劉厚基由十里長灘會商張曜由五勞不拉向北路進行約百里距準噶爾貝子營盤二十里之慶達瓦廟探報有賊在敢執漢盤踞未動即督隊前進行抵拉林一帶遙見溝中火光隱隱騎賊數百正在造飯遠前薄之擒斬數十名獲馬百餘匹賊即潰竄張曜督所部緊蹙賊蹤追二十里收隊暫駐瞥見迤西西北火光燭天張曜令各營募食聽令五鼓親率各營由敢執漢盤溝西進行三十里詎賊尙踞達拉川遂整隊前進徐效孟楊春祥王明泰等見賊即擊賊即紛紛敗潰張曜麾各軍追之擒斬數百名賊分路鼠竄一向正西一向西南猶盤旋邊外各處張曜督各營緊追十四夜乘月色皎潔馳七十餘里抵臺陽川二庫地方詎賊眾悉聚

於此張曜飭李富貴王明泰潛繞西北截賊去路飭各隊分路歷
擊連踏賊巢三十餘處斬賊遂多十五日黎明正分隊搜殺閒忽
有賊步騎數千紛紛回撲官軍整隊迎擊賊不能支屍橫遍野陣
擒賊目馬明及陳彥王守成蘇旺林等二百餘名訊明軍前正法
解散脅從數百名官軍陣亡者僅千總胡桂發及勇丁二名受傷
十七名而河西及準噶爾地貝子境內均無賊蹤此張曜一軍由
河曲履冰而西連獲勝仗實在情形也其金順劉厚基兩軍據報
十二月初六日波羅營西有大股賊竄至酌畱副將萬金榮遊擊
李考祥三營守波羅扼之自帶所部七營步隊及馬隊百餘名兼
程東行十二月初六日馳抵府谷之鎮羌堡探知賊踞邊外古城
法寺胡家灣直至十里長灘地周百餘里初九日五鼓金順率所
部及劉厚基之中營前進行四十餘里遇賊數千擊敗之擒斬約

千餘名是日駐軍古城覘賊踞十里長灘初十日劉厚基率馬步三營會剿十一日進攻賊已於先夕棄巢先遁矣金順劉厚基尾追二百餘里直抵哈慶當王廟收隊沿途斃賊近千名生擒數十名十四日仍回駐古城賊已悉數西竄晤商張曜暫留古城金順劉厚基遂折回榆林剿葭州米脂之賊十九日抵榆林劉厚基接據所部後營知縣梁以恭稟報初十夜率該營弁勇已將米脂桃花茆攻寨之賊擊敗斃賊數百名寨圍遂解臣等竊維竄犯歸綏榆林之賊及葭米之賊皆董福祥等黨夥經張曜金順劉厚基成定康慶次擊敗劉松山又急由綏德掃蕩而西擣其巢穴東北敗餘之賊必急於回顧可知不但歸綏邊境遊氛漸斂卽榆林綏德亦廓清有期北路機局實爲順利 上諭軍機大臣等成定康劉松山等軍由清澗及綏德等處進剿疊獲大捷事機極爲順利在事

尤爲出力之將領士卒著左宗棠等存記彙案保奏候旨施恩匪
勢見極窮蹙左宗棠庫克吉泰劉典務當飭令各軍乘此聲威分
路進攻將敗殘餘匪悉數殲除爲次第廓清之計董幅祥恃鎮靖
堡爲堅巢其眷屬則竊踞靖邊該逆一日不除賊黨一日不盡著
左宗棠等檄飭劉松山統帶所部進攻鎮靖堡徑擣賊巢迅殲醜
類惟師行日遠轉饋愈難應如何源源接濟俾軍食不至缺乏之
虞著該大臣等妥籌辦理竄邊逆匪經張曜等屢次擊敗劉松山
又由綏德埽蕩而西直擣董幅祥老巢該逆急於回顧不但歸綏
游氛漸斂卽榆林等處官軍剿辦亦易得手著左宗棠等激勵將
士迅赴戎機毋稍延緩董志原回逆首鼠兩端見又求撫左宗棠
等恐其包藏禍心未敢將就了事所見甚是該大臣等務當相機
妥爲辦理毋稍大意將此由六百里各諭令知之○諭成祿奏克

復肅州城池一摺本日已明降諭旨宣示矣肅州業經克復成祿
當懷遵屢次諭旨迅帶所部剋期出關奮勉圖功以副委任楊占
鼐帶兵尙能得力卽著隨同成祿出關剿辦賊匪肅州地方不可
無兵鎮攝著成祿酌留數營以顧後路成祿出關後所部軍火糧
餉必須源源轉運穆圖善當斟酌情形派員在肅州地方妥爲經
理俾免缺乏肅州善後事宜著穆圖善飭令地方文武悉心籌辦
務臻妥協安肅道蔣凝學如尙未能赴任卽著遴派妥員前往接
署毋令員缺久懸成祿另片奏見派馬忠良等充當回民頭目請
先行獎勵等語馬忠良著賞給三品花翎馬金貴蘇海麟韓忠國
均著賞給四品花翎仍責成該回民等將該處回務妥爲料理不
得滋生事端至此次克復肅城成祿由六百里加緊馳奏並附紅
旗殊可不必嗣後遇有克復地方止須照常入奏俟新疆全境底

定再行馳報紅旗將此由六百里各諭令知之○以克復肅州賞提督成祿楊占鼇黃馬褂餘加銜升敘有差○予陣亡從九品熊奎祭葬世職○壬辰諭軍機大臣等定安等奏敗匪糾合同逆撲犯草地經官軍追剿獲勝一摺邊外回逆經官軍擊敗後復敢糾合同邊內大股回匪出邊希圖牽掣官軍撲犯包頭鎮薩拉齊經達爾濟大敗賊於布爾噶蘇臺扎哩克召等處追殺五十餘里附近各村竄匪均經殲斃其達拉特旗西北大股賊匪亦經扎那格爾第等督隊迎剿擒斬頗多該逆喪膽向西南敗遁剿辦甚爲出力卽著定安等知會杜嘎爾督飭達爾濟等乘此聲威節節跟追奮力掃蕩並著飭知馬陞督率沿河防兵加意堵遏毋令該逆得以撲犯以固邊防將此由五百里各諭令知之○以榮工久未合龍嚴諭蘇廷魁李鶴年堵築○蔣益澧以病免以史念祖爲山西按

察使

記名按察使

○癸巳諭軍機大臣等穆圖善奏官軍擊退竄擾南

路陝回秦安等城解圍並請飭金順前往定邊等處勦辦各摺片陝回馬鎮和崔三率領馬步賊眾數萬圍撲秦安縣城經敖天印等分路鈔擊斬馘甚多該逆復直趨清水縣地面官軍夜襲賊壘賊向東路分竄由秦州北路分道進逼四面仰攻疊經敖天印等追殺賊勢不支退竄關山隴州一帶此次賊股竄撲南路意在救援河州敖天印各軍均能踴躍用命將秦安清水秦州城圍立解所有出力員弁著准其擇尤彙案奏保惟秦州爲該省完善之區該逆股素所垂涎見雖經官軍勦退難保不聲東擊西乘間分擾仍著穆圖善督飭敖天印等偵探賊蹤乘勝壓勦以杜回竄河州地方緊要並著嚴檄在事將士奮力截擊毋任此股前往救援復形棘手定邊花馬池等處直達歸化包頭固應嚴密防範第金順

見在榆林一帶勦賊正屬得手未便拔隊前往著俟該處賊匪埽除淨盡再行相機移紮此時花定一路應如何保護糧道穆圖善仍當妥籌辦理前據左宗棠奏官軍疊獲勝仗賊勢漸衰劉松山等已由綏德西進卽著該大臣等檄令各將領與金順等軍聯絡聲勢迅將榆綏等處踞賊痛加勦洗用竟全功將此由六百里各諭令知之○甲午諭軍機大臣等蘇廷魁李鶴年奏榮工合龍並籌辦善後一摺業經明降諭旨將蘇廷魁等獎勵出力員弁並准保奏矣見在大溜併股東趙仍靠壩前必須普壓大土其大壩前後應鑲護埽應幫土戢及增培隄壩均當速籌妥辦南岸三廳修守尤關緊要著蘇廷魁等卽將此次節省存項籌備物料責成該管道督飭趕辦務期全工穩固永慶安瀾不得草率從事致有貽誤將此由四百里各諭令知之○諭曾璧光奏川黔各軍克復汎

城攻拔賊巢一摺川軍陳希祥由安平進剿連戰皆捷平毀苗苗
關永豐山一帶賊營克復定安汎城平丹六崗等處積年賊巢亦
經獨山州文武紳團次第攻拔提督林從太在都勻設伏擊賊歷
有斬擒辦理均尙得手著曾璧光督飭派出各軍會同川師陳希
祥合力勦辦迅掃狂氛獨山州出力員弁著曾璧光擇尤保獎毋
許冒濫另片奏請催廣東欠餉等語粵省於應撥黔省月餉積欠
甚多見在貴州軍務漸有起色亟須餉項充足方能乘機進取著
瑞麟李福泰將積欠黔省月餉於該省司庫鹽運粵海關三處款
下按月勻撥解黔以濟要需毋再延誤將此由五百里各諭令知
之○丙申左宗棠奏劉松山上臘十六日大獲勝仗後擬十八日
進攻鎮靖堡業經臣等於正月十三日馳報其時方以未得劉松
山續報爲疑拜摺後接劉松山除日捷報始知上臘二十日曾將

十八日追至鎮靖堡董幅祥跪乞投誠應否准予安置各事宜馳稟請示臣等迄未接到料是驛遞沈失應俟行查據劉松山續發報稱二十日發稟後卽催董幅祥之父董世有及董幅祿迅將鎮靖堡及靖邊縣城所有降眾難民造冊呈覈旋據董世有訴稱各股徒眾疊蒙截勦其畏誅者或向榆林米脂一帶或向延長竄逸董幅祥隨身三四人未知竄向何處見已專人喚回稟懇寬限數日其屢彰餘黨未就撫者經疊次勦辦亦詣鎮靖堡造冊乞撫南路探報賊首李棟卽李登李雙良張萬會卽張萬飛姬滿春等糾集餘黨屯踞洛珠川一帶距堡一百三十餘里二十三日劉松山飭章合才率左軍蕭章開率右軍及右後兩營馬隊取道烏牛川進勦正拔行聞西路探報有回逆一股由西而來屯踞定邊縣屬之高小灣距堡西一百三十里劉松山自率中軍飭易德麟率

前軍卽夜三鼓潛師西進令步隊兩營守老營護輜重二十四日
行一百里駐張家溝馬隊營官提督余虎恩擒獲回逆四名訊係
回目令其假官軍裝束前來偵探者據供此股回眾約有三四千
皆騎馬從下馬關維州萌城一帶而來見踞高小灣回首爲馬萬
得馬棘子劉松山訊畢卽傳令三鼓傳餐出隊行二十餘里遙見
高山灣一帶火光隱隱麾軍分路急進逕逼高小灣回逆瞥聞官
軍突至驚駭失措有騎無鞍之馬亂逸者有牽馬狂奔而馬不前
者官軍急起蹙之其未及竄逸之賊敗匿民房劉松山督中路馬
步立將民房圍住前面各村之賊不復回顧各圖逃命易德麟率
所部及中軍隊伍躡蹤追之連破賊館七八處時已天明見回逆
悉向西路逃走劉松山飛飭馬隊兩營隨易德麟步隊分路追殺
十餘里擒斬約二百餘名其高小灣被圍各悍回經中路各營接

殺淨盡得倖脫者不過十餘人是役共計斃悍回約六百餘名生擒二百餘名而官軍陣亡者二名受傷者十四名而已二十六日停軍高小灣探報回逆已遁歸老巢二十八日收隊還鎮靖堡適章合才蕭章開勦洛珠川之賊事畢振旅言旋詢知二十四日五鼓師抵洛珠川出賊不意騎賊雖列隊抗拒而步賊已紛紛潰走章合才蕭章開整隊壓之賊向西南狂逸不止窮追三十餘里沿途斃賊千餘名生擒三百餘名拔出難民男婦數千官軍僅受傷三名而已復接畱駐山西軍渡提督何作霖稟稱二十二日聞吳堡北境有賊二千由螞喇峪竄至攻破三和源白家塌一帶民寨比卽商同提督周國勝楊清源由軍渡過河行二十餘里抵石堆山見賊圍攻民寨卽督隊猛撲賊見官軍大至解圍狂竄官軍乘勢蹙之緊追三十里至汪家渠沿途斃賊百數十名生擒四十三

名奪獲騾馬八十餘匹賊敗向西南何作霖仍收隊還軍渡此劉松山全軍三剿土匪一剿回逆克獲全捷實在情形也惟是劉松山渡河而西縱橫埽蕩由綏德而西北至懷遠折而南至安定復西至靖邊之鎮靖堡又西至定邊屬之高小灣見收隊暫還鎮靖所歷皆荒墟廢井人煙斷絕深入賊窟前無可因之糧鎮靖堡距綏德州已四百餘里綏德州距山西永甯州該軍採運軍糧之處又一百餘里餉饋不繼屢接劉松山牘稱軍糧告罄宰騾驢雜糞充飢各營運糧騾馬又芻秣闕乏多已飢斃等遠隔千里不能代爲設措徒切隱憂而榆延綏兩郡一州積年巨寇經劉松山此次痛剿實已震懾兵威或稽顙輸誠或嚮風迎附皆懇請免于誅就地安插以天理人情言之此輩初本朝廷赤子弄兵潢池斷無抗拒之理以事勢言之此輩因禦回力竭無家可歸迫而爲匪

較回逆之阻兵安忍窮蹙來歸其罪猶有可恕今辦回尙議勦撫兼施而於禦回之匪不予安插亦拂我皇上仁育義正大德好

生之心其榆延綏鎮屬災民之更宜速圖撫賑則固無論也顧安插非有見成之款就近速爲撥解不可土匪難民已多飢斃非急籌糧食速爲散給不可而陝庫無款可籌臣等餉源早涸實屬無計可施籲懇 皇上天恩飭綏遠城將軍於邊外代籌糧食交割

都統金順轉輸入邊接濟均於另片陳明而榆林漸已解嚴有張曜劉厚基兩軍足資控制金順一軍應卽請旨令其拔赴靖定一帶駐紮一便轉運邊外雜糧一便防勦西路回逆於目前局勢似爲相宜又奏陝省用兵以籌糧爲要兵燹後亦惟籌糧爲難見時大兵雲集自延鄜迤南以至汧隴各軍所需糧食草料或就地採辦或由外省購運來陝車駝夫馬絡繹載途勞費萬狀延鄜各屬

迤北以迄沿邊如金順劉松山劉厚基成定康郭寶昌等所部兵勇馬步五六十營餉糧既急轉運尤艱北山以內兵燹連年土地荒廢過多無糧可辦勢不能不於山西沿河一帶設局採購以期迅捷然延綏北境如膚施安寨保安安定定邊靖邊各縣地接邊荒道險且遠卽由山西採運轉輸亦苦鞭長莫及因思榆林邊外東至綏遠城西至花馬池中間附近邊牆之包頭磴口等處民人向來墾種水地產糧最多客商隨處開設牛犍囤積售賣以爲常業聞金順等頻年軍糧卽取給於此惟其地分隸綏遠城將軍所轄薩清托等五廳若由陝派員越省攜銀採運入地生疏恐多窒礙況所需糴本過鉅陝西司道各庫一空如洗各省協濟之款解到寥寥前欠旣多一到卽盡無從籌此鉅款以濟急需而榆綏各屬難民降眾計男婦大小不下二三十萬口又未可坐視其槁死

荒谷不得已借提江南解到劉松山軍餉銀五萬兩以二萬兩解交金順以三萬兩解交成定康作爲賑撫安插之費耶濟目前然亦杯水車薪無裨大局合無仰懇 天恩飭下戶部迅撥庫款見銀十萬兩徑解綏遠城飭下綏遠城將軍定安速派幹員分赴各牛俱定購糧石相度地勢遠近解交副都統金順轉發成定康爲賑撫安插之用庶冀無數殘黎得沐 皇仁稍延殘喘此時距秋成之期甚遠安輯之後尙需爲籌口食籌牛種耕具俾其各安耕鑿永爲良民則猶待餉項有出始能通融挹注其應手與否非臣等所敢知也除咨請定安金順檄飭成定康辦理復函商定安懇其代展一籌並派西安佐領喜勝馳赴綏遠城面陳一切伏懇 聖慈垂念邊方殘黎飢苦情形特允矜全飭部速與撥解 上諭軍機大臣等劉松山一軍自綏德埽蕩而西至靖邊之鎮靖堡又

至定邊之高小灣三勦土匪一勦回匪均獲大勝洵屬謀勇兼優
深堪嘉尚土匪董幅祥之父董侍有及董幅祿畏懾聲威將鎮靖
堡及靖邊縣城降眾難民造冊乞撫扈彰餘黨亦詣鎮靖堡乞降
左宗棠等因其罪尚可恕不忍峻拒自係目睹其畏懾真情確有
把握卽著該大臣等妥爲安插惟董幅祥隨帶二四千人未經招
回尙未可恃著左宗棠等嚴飭董侍有迅速喚回毋令遷延變計
其未投誠之賊首李棟等仍著飭令劉松山各軍奮力追勦以淨
根株陝省北山素稱瘠苦籌糧爲難亦係實情本日已飭戶部撥
給部帑十萬兩解赴歸綏著定安於此項銀兩到後派委妥
赴各牛犇定購糧石解交金順大營轉發成定康以備賑撫安插
之用第恐歸綏各屬一時未能得如許之糧並著定安設法採買
解往毋令缺乏金順一軍前因穆圖善奏請飭赴定邊一帶曾諭

該副都統酌度辦理見在榆林既有張曜等軍足資控制著金順
仍遵前旨如東路可以無事卽仍回靖定一帶駐紮以資堵剿將
此由六百里各諭令知之○諭岑毓英奏尋甸官軍失利省城後
路喫緊並請飭川省派兵援應迅解協餉一摺據稱李維述各軍
攻拔廠口羊街等處逆壘並祿勸境內肅清該逆力撲尋甸馬祥
麟賀聯璧等所紮營堡相繼失陷全祖凱各營潰散附省逆匪攻
陷東門外營盤見經恢復等語覽奏實爲詫異前據劉嶽昭奏親
赴尋營督戰何以當各路得手之時變生意外該督頓兵曲靖已
及一年而於尋甸一隅並不奮力進剿殊屬意存觀望此次如已
行抵尋營馬祥麟賀聯璧等營堡失陷何竟漫無鈐制設賊勢從
此蔓延以致省城搖動該督能當此重咎耶著卽馳赴前敵督飭
全祖凱等收集兵勇晝夜環攻以期痛殄賊氛毋得一誤再誤省

垣關繫緊要岑毓英仍須督同馬如龍激勵士卒將附近匪巢相機攻拔所有失守營壘之千總楊義培廖鼎宗著卽革職拏獲就地正法以昭炯戒新降回目馬祥麟父子三人

著成文書未盡

側著劉嶽昭查明奏請議卹全祖凱賀聯璧防

子

據實奏參川滇爲唇齒之邦滇事垂危川省豈能坐視著崇實吳棠迅派得力將弁酌帶兵勇由東川曲靖分路援應毋稍遷延應解滇省協餉並著該督源源籌解以資飽騰劉嶽昭岑毓英於援軍未到以前總當就見有兵勇斟酌緩急併力攻剿以維全局將此由六百里各諭令知之○撥部庫銀十萬兩解綏遠城購備陝西軍糧○丁酉諭軍機大臣等劉嶽昭奏尋甸援賊猖獗暫行退守請將文武員弁分別革職治罪並自請嚴議一摺尋甸援賊圍攻果馬該處數十村翻旗從賊謝景春等擅自撤營以致各營失

守劉嶽昭見擬仍回曲靖覽奏曷勝憤懣滇匪反覆無常雖屬慣技劉嶽昭辦理此事毫無把握殊負委任卽著懷遵昨日諭旨馳赴前敵督飭全祖凱等收集兵勇痛殄賊氛並飭道員劉嶽曙等分紮馬龍王家莊鐵廠等處力爲兼顧不得以居中調度爲辭遷延不進致滇省全境震動仍一面商同岑毓英力固省防將附近匪巢迅圖攻拔毋得互相觀望貽誤事機所有撤營不報之總兵謝景春著卽行革職如再不知奮勉卽於軍前正法知縣謝培元縣丞梁廣熙均著革職永不敘用昭通鎮總兵李家福著革職畱任總兵李盛貴鍾福俊王與仁副將賀聯璧均著革職畱營效力滇營將弁疲玩已極此次失律損師各員姑照所請分別革畱以示薄懲嗣後該督等務當申明紀律如再有似此畏葸等情卽按照軍法從重懲辦毋稍姑息劉嶽昭調度無方著交部嚴加議處

同日馬祥麟等及陣亡之員弁兵勇均著查明請卹將此由六百里各諭令知之○庚子卞寶第因病賞假以英桂兼署福建巡撫

由閩浙總督兼署

○辛丑左宗棠秦陝西北山延鄜甘泉一帶處處與董

志原回巢毗連回逆因飢掠食出沒靡常而土匪潰勇夜則伏匿山巖晝則聚眾肆擾此勦彼竄蹤迹亦復無定楚軍前路記名提督劉端冕一軍於十一月下旬由鄜州率隊赴延接捕附郡土匪十二月初八日擊賊於陳家紙坊克之又擊之下寺灣踞村之賊按殺略盡而村外巖洞十餘處穴山臨水嵌空陡峻僅鳥道一綫可通實爲匪眾逋逃之藪劉端冕飭各弁丁孫升而上甫及巖口賊礮石紛下登時中傷數名副將張復盛攀登仰攻復中石墮跌巖下劉端冕親督各營弁丁冒死衝上前者隕下後者復進賊始敗潰巖洞以次平毀計斃賊二百餘名生擒張保兒等三十餘名

奪獲軍械無數是夜隨據探報董志原回逆數千已由新集將台東竄劉端冕遂率隊於初九日馳赴甘泉初十日列隊高家哨時賊馬步蠭擁而至瞥見官軍步賊退立山岡馬賊逕前搏戰副將王開福都司盧華前直衝賊陣中槍陣亡賊合力猛撲官軍屹立不動槍礮連轟子如雨注賊勢不支官軍大呼乘之步賊先奔馬賊繼潰仍由將臺一路飛馳而去同時復有回騎數百由交口槐柏鎮竄入上曹村另股擾及三叉河並有大股由太白鎮竄麻子街以出甘泉勞山十三日劉端冕飭知縣邵杜總兵文明章率前營東出洛川以攻上曹村令副將劉竹田率鎮西營南出秦關以勦三叉河自率中左右後各營分駐甘泉勞山麻子街以防大股竄入一面函請統領武威軍道員魏光燾會師助勦十九日賊前騎數百由府村口進撲麻子街官軍探報賊騎數千已竄至蘇家

河廟背一帶劉端冕知大股踵至慮勞山兵單遂自率各營星夜馳剿二十三日黎明登高瞭視廟背以至勞山十餘里塵埃蔽天知回眾大至比飭先鋒馬隊及後營由大路迎擊左右兩營循山左繞進禦賊包鈔而自率中營由河干橫截而出部署甫定賊數百騎已馳騁而來步賊繼至後營列方陣以進槍礮環擊賊不敢進先鋒馬隊突前衝之中營復自河干截出前賊敗走而後賊復蠡擁而至已革鄆州都司張鵬程躍馬陷陣中槍遽殞賊乘勢猛撲我軍槍礮轟擊斃賊數名賊死拒不退自辰至午相持未下維時劉端冕所派之前營邵杜文明章已率隊掃蕩上曹村股匪並剿平土匪鄒光連聞旁山有警卽拔隊星馳適從賊後掩擊而至而左右兩營亦同時擊敗包鈔之賊由山左突出前後夾擊賊大敗奔潰官軍縱橫壓擊計共殺賊五百餘名生擒張慶恆王八癩

子等三十餘名餘賊悉向王家坪一路西竄其前竄三叉河另股經劉端冕派令鎮西營副將劉竹田由秦關馳剿十五日敗賊於苦桐堡十九日追敗之於陶池二十二日駐師白水適澄城有回騎數百與前賊會合循洛河上竄已至下乞佛村魏光燾委從九張兆雄解餉路過突與賊遇張兆熊卽寄餉堡內而自率百餘人與賊鬪劉竹田聞前途有賊率所部自白水截出至朱牛鎮槍礮聲緊乘勢衝入賊大驚駭劉竹田大呼乘之張兆熊復自內奮勇夾擊賊大潰我軍追至馬家河賊分路下原循洛河而走劉竹田由急令幫辦劉臣儀率馬隊馳赴上游攔截而自率步隊沿河跟剿追至馬家河兩岸高原賊不能上劉臣儀又自上壓擊而下溝中之賊無路奔逃悉爲官軍擒斬生擒逆目馬化祥解省訊辦此劉端冕一軍劉竹田一營十二月閒痛剿回土各匪迭獲大勝實在

情形也

臣

等聞土匪陳瘋子卽陳海春與潰勇陳一本沈淮清糾

合逃勇飢民勾結回逆竄擾宜洛各境卽密飭統帶猛營遊擊張雲松副將張星元就近接捕十二月初九日遊擊蔡春榮密約孟家塢外委李汝淵襲賊於老窯坡分布勇丁扼住山口自率壯勇直入該逆逃竄無路拚死格鬪傷我軍十餘人賊亦死亡相繼我軍奮勇衝殺劉竹田亦率眾踵至助剿逆首陳海春等以次就擒餘黨百餘人無一脫者正收隊回宜川途次忽聞回旗千餘屯踞縣境東北土基村撫標左軍副前營副將唐寅清已率隊馳剿張雲松張星元恐其力單卽調齊三營星馳助之十三日辰刻抵村各勇奮力攻撲唐寅清繞出村前首尾夾擊斃賊八九十名餘賊北竄張雲松等督隊追擊沿途均有斬獲日暮收回宜川維時記名提督郭運昌率卓勝軍前隊陸續赴宜聞前賊北竄已至甘肅

鎮遂商請張雲松畱防後路而自率各營並會同唐寅清追剿十七日擊甘肅鎮之賊敗之十九日復擊之雲岩斃賊頗多二十二日追至百尺鎮賊奔竄不及悉銳回撲千總王化成衝入賊隊中矛陣亡賊追撲益勵提督蔡光武總兵李華文等急麾軍排擊而下槍矛迭施斃前賊數名賊漸披靡會猛營亦由宜川馳至前後夾擊賊大敗西竄官軍分投追殺餘眾四散奔逃悉由延川安定一路竄去此張雲松三營及郭運昌卓勝一軍十二月間剿賊獲勝實在情形也當各軍剿賊甘鄜宜延之交其時董志原回逆適分股由太白山河平子等鎮東犯而涇南汧隴靈臺各處亦有賊騎竄入多或千餘少亦數百其從太白山河入者十四日渡惠道河入安子頭魏光燾在中部聞報卽率隊渡河直趨槐柏鎮截剿至則該逆已過槐柏擾及橋章十五日魏光燾追及之敗賊於石

堡川賊竄要隘十六日提督左日升副將伍正得攻要險之賊賊倚山布陣猛撲直前遊擊史秀成衝入賊中身受數矛傷登時殞命把總鄭有德力救亦中矛陣亡賊騎四合副將王正和急率親兵大呼陷陣總兵吳禧德周勝元率馬隊橫擊槍轟矛刺立斬悍賊數名左日升于奇冲乘勢衝殺賊大潰魏光燾麾軍奮擊斃賊百餘追殺二十餘里餘賊由街子河一路西竄其從山河走平子鎮入者十一日至湫波頭十二日至麻園總兵張福齊率師自職田馳勦十三日賊以數百騎東竄馬欄鎮而以另股撲底廟牽制官軍張福齊督隊攻之賊未及列陣總兵蕭寶林周玉堂等突前衝殺縱橫馳驟槍矛疊施賊勢披靡副將祝鑑嵩參將劉忠發大呼繼進賊大敗仍由平子鎮竄回張福齊撤隊回職田卽派徐萬福黃有本等營東追馬欄之賊沿途探賊已入石門關遂星夜擊

截殺落後賊十餘名前賊策騎飛馳已由照金鎮一路竄入時甘肅提督高連陞在同官聞報卽整隊東馳十八日至曹村聞賊已由道賢鎮竄澄城十九日抵澄則賊已竄至趙村武安村一帶高連陞慮賊騎驄忽非步隊可及也遂令步軍回防而率馬隊漏夜馳擊二十日抵趙村天未明官軍一擁而入賊驚起殲除過半餘賊棄馬奔入武安村賊盡出列隊以拒副將謝春臺把總張世發怒馬衝入賊並力環刺謝春臺殞於陣前張世發身受數矛傷力戰不退遊擊桂錫楨急率百騎由原上鈔出村後高連陞督中軍排擊而前再接再厲賊敗入村口官軍奮威衝入賊大敗繞村而逃官軍分投追殺桂錫楨亦自村後鈔出賊無路走悉棄馬滾溝而下官軍乘之殺斃跌斃之賊無數餘賊翻溝奔上咸和原連夜竄走榆樹河二十二日魏光燾截之於丁家原擒斬淨盡此魏光

燕張福齊高連陞等軍十二月閒勦回大勝情形也其由董志原南竄涇州之賊十一日至丁郎十二日破董家堡固原提督雷正綰自早勝馳擊賊不虞官軍驟至閉門拒守官軍四面環攻賊礮石雨下官軍驟傷十餘名副將余國榮肉薄而登復中槍斃命雷正綰督勇從缺口急攻前隊被傷後隊繼進槍礮連施賊不能支退入堡內官軍奪門而入分途搜殺賊無可逃計堡內賊二百餘名悉殲無遺並奪獲騾馬百餘匹拔出難民無數其渡涇河由崇信南竄之賊分爲三股其由靈臺高巖入者約八百餘騎十六日破瓦子潭踞之十七日員外郎銜中書吳士邁自鳳翔馳至麻夫站十八日冒雪進攻午後抵山下賊尙未覺總兵朱德樹參將劉厚福等分路上山賊倉皇拒敵官軍奮勇衝突槍矛並施登時斃賊數十名賊大敗竄下山官軍從後躡擊雪深路滑賊顛撲墜巖

者無數官軍跟追二十餘里沿途斬殺三四百名餘賊仍 靈臺

寨子山北竄其由崇信靈臺之間竄入隴州東境者甘肅按察司
張岳齡自汧陽進擊十九日探賊踞麻家臺約馬三百餘人張岳
齡潛師夜起二十一日黎明馳抵賊巢參將陳泰益大呼直入賊
驚覺紛出抗拒官軍奮威衝殺立斃悍賊十餘名賊棄麻家臺而
遁官軍乘勝追擊賊回撲數次官軍愈進愈猛賊無可乘遂大敗
奔潰追至鎖匙垵又斃賊數十名餘眾悉向齊家塬奔逸其竄入
隴州北境之賊十六日攻雷家堡未下知府喻步蓮率師援之賊
解堡圍而去二十日走胡道村二十二日至韋家堡伐木梯四面
環攻二十三日喻步蓮得報星馳賊見官軍復至卽撤圍列隊猛
撲直前官軍屹不少動賊稍卻副將劉寶林乘勢衝入蕭羣魁龔
曉亭等大呼繼之左右夾擊槍礮紛下賊死傷枕藉大敗奔潰官

軍追殺十餘里餘賊悉向崇信飛奔而去此十二月閒雷正綰吳士邁張岳齡喻步蓮等軍勦回獲勝實在情形也頃據延安守將劉厚基刑部主事周瑞松稟報土匪李雙夏高萬全經劉松山勦敗率眾南竄本年正月初一日其黨尙榜陳明桂擾及西河溝劉厚基馳至廟店山截之賊恃險抗拒官軍奮力仰攻槍礮雨至賊陣亂總兵羅長春副將陳振贊由山後突入官軍分道上山賊無路走官軍四面環擊陣斬尙榜陳明桂餘賊掄斬殆盡其宜洛一帶回逆前經郭運昌張雲松等擊敗而後股尙出沒於宜韓境地正月初七日竄至白馬灘一帶火光甚熾官軍疾馳掩擊賊遂驚竄隨據生掄回逆供稱賊後股尙在石堡川郭寶昌比飭提督王鳳鳴等率馬隊前驅自率步隊由關家山繞擊初八日黎明抵石堡賊已列隊川上扼險以待王鳳鳴等逕前衝撲賊死拒不退槍

矛互擊正在相持適郭寶昌已繞過關家山率步軍由山口壓擊而下前後夾擊大敗紛竄官軍紛投掩殺斃賊二百餘名奪獲騾馬百餘匹餘眾翻山向延長西北一路竄去此正月初旬劉厚基郭寶昌剿賊獲勝實在情形也是時延長延川一帶回逆自上臘由甘廊竄入飽掠將歸前隊已向甘泉大股尙踞金盆灣等處劉端冕知賊必趨勞山而情歸之宜急擊也遂伏軍於勞山左右以待之一面函請魏光燾率師會剿初九日探賊已過臨鎮午後步騎並至楊旗鳴角紛向勞山大路西馳劉端冕見賊輜重在後戒各軍毋遽進俟前賊過半突出喻經魁文明章大呼橫截而出前賊回馬猛撲官軍擊敗之其截斷後賊亦相顧驚潰拋棄糧食奪路狂奔官軍奮威衝殺躡蹤緊追初十日至劉家屯敗之又敗之於廟背擒斬甚眾奪獲糧食二千餘袋騾馬五百餘匹十一日追

至岳家屯斬斷後賊百餘名前賊已由府谷一路西竄魏光燾前接劉端冕函報卽拔隊赴甘泉中途忽聞賊自金盆灣分百餘騎竄至太平村初八日至桃源相距僅二十餘里魏光燾移師剿之賊倉卒出敵官軍分路排擊而進四面圍攻村內之賊斬殺淨盡初九日仍擬赴甘泉助剿途次得報知賊已爲劉端冕擊敗仍由勞山走府村計必取將臺槐樹莊一路回竄魏光燾卽率隊西馳十一日抵張村十二日抵府村探賊已竄將臺十三日尋食擊之賊列隊回拒魏光燾麾軍奮擊縱橫盪決斃賊無算賊大敗盡棄所掠糧食約向廟耳石廠子兩路狂奔十四日正擬拔隊窮追復探報僞胡元帥率黨數千由府村踵至魏光燾遂分軍伏將臺邀之自率親軍待敵十五日辰後賊麇至瞥見官軍步賊卽竄而北馬賊逕前撲陣官軍奮擊之賊且戰且退追十餘里伏發官軍從

賊陣中突出賊驚潰狂竄委棄糧袋軍械填塞道路官軍數路追擊擒斬千計奪獲駱駝騾馬千餘匹所掠糧食盡爲官軍奪回餘賊悉由太白鎮竄回老巢此正月十五日以前劉端冕魏光燾勦辦歸巢回逆連獲大勝實在情形也臣等竊維董志原回逆雖疊經勦敗兇骸漸衰而自延鄜迤南以達汧隴賊騎紛紛四出冒死掠食幾於無日無之官軍非裹糧數日不能盡力窮追又步騎相懸常有不及之勢土匪董幅祥等業已投誠然敗殘零匪遊騎無歸仍復伏處山巖乘虛竄掠各弁勇星馳露宿寢饋不遑往往擊回匪而土匪忽來勦土匪而回逆踵至東西交警羽檄紛馳雖釜底遊魂終歸撲滅而人數較眾究未能責效於數戰之間臣等惟當嚴飭各軍迅將北山餘匪一律勦除然後合力掃蕩而西以紓聖廬又奏榆綏土匪董幅祥倚靖邊鎮靖堡一帶爲老巢自率

悍黨數千並分遣賊眾四出竄掠署綏德州知州成定康既隨劉松山轉戰而西忽聞董逆由府谷神木竄入葭米遂急率隊回州上年十二月十八日師次何家岔十九日至王家坵探報該逆向東折竄已至開花寺劉家塢等處逼近黃河成定康卽令陳瑞芝龍錫慶督率各旗冒雪前進初更抵棘針店距賊尙三十餘里二十日整隊前行沿途卽遇賊騎數百由右路衝來經陳瑞芝戴光明喻先恕麾隊衝擊賊卽疾走我軍追至劉家塢賊萬餘分踞左右山坡嚴陣以待陳瑞芝卽率喻先恕戴光明由右成光熙率李長樂等由左龍錫慶率成榮華等由中路策應賊見我軍三路進攻蠡擁來撲陳瑞芝率隊進擊槍轟矛刺斃賊數名賊陣未動龍錫慶卽由中路衝出賊死拒喊聲震山谷正在相持成光熙遽自左路山下掩至哨官張德榮徐尙清等躍馬上山殲賊先鋒白聯

桂賊氣奪李長樂率馬隊縱橫陷陣中右兩路乘勢衝突陣斬黃衣賊目二名賊大潰追至劉家下塢奪路狂奔我軍分途掩殺斃賊數百名窮追二十餘里沿途擒斬無算餘賊向西北竄逸時值高逆餘黨張萬飛自張家臺敗後乘我軍西剿收合各處餘賊復得數千竄入綏德州南至王家溝一帶成定康卽飛調各旗隊伍於二十二日回州二十三日進駐雷家溝二十四日抵王家溝該逆正攻民寨甚急突見我軍數路掩至步賊大亂狂奔而馬賊猶復直前抗拒軍功李炳蓮發一槍適中狐裘賊目一名落馬後訊知爲僞幫辦胡梯雲甘肅固原廩生也賊見匪目就殲無復鬪志各旗乘勝衝殺賊悉奔潰我軍跟蹤追剿及之於柏樹坪二十五日又及之於清潤河計共斃賊三百餘名奪獲騾馬百餘匹餘眾竄向延川二十六日擾及頁河子撫標親兵前營記名提督劉聲

集在延川間報率隊馳剿賊即敗走餘賊悉翻石山坡西竄此成
定康一軍十二月下旬進剿州南各匪兩獲大勝及劉聲集一營
截剿獲勝實在情形也見據劉厚基成定康稟報榆林綏德已一
律肅清謹附片陳明 上諭軍機大臣等上年十二月間劉端冕
一軍由鄜州至新集將臺等處分剿回土各匪連獲大勝宜洛一
路賊匪亦經張雲松郭運昌等分途追殺其東竄太白山河等鎮
南竄涇州回股疊爲魏光燾雷正綰等軍擊敗本年正月間劉厚
填郭寶昌等復將延安土匪宜洛回匪痛剿延川延長歸巢回逆
並經劉端冕等追擊擒斬甚多剿辦尙爲得手即著左宗棠等督
飭各軍乘勝跟追大張捷伐竄擾葭米綏德之董幅祥張萬飛各
股經成定康等疊加截剿榆綏見已肅清該處兵勇自可調赴西
路併力進攻著該大臣等斟酌情形將見在如何布置之處詳悉

具奏西征一事必左宗棠督軍前進將士更易爲功著卽將首防事宜妥爲料理一面厚集兵力剋期出省節節掃蕩陝省逆回蔓延已久該大臣務當一鼓作氣速奏廓清之效諒不待朝廷再三敦促也其榆綏兩屬善後事務著劉典嚴飭該地方加意經理並著該大臣行知金順仍遵前旨回紮靖定一帶以資堵剿董幅祥是否投誠此次片奏何以又有董逆由府谷神木竄入葭米之事卽著查明具奏將此由六百里各諭令知之○壬寅諭軍機大臣等李鴻章奏遵查湖南藩司李榕參案先行覆陳大概等語李榕用優伶翠喜爲家丁業已確鑿其有無縱令攬權詐贓及挾妓買良冤抑屬員苛斂殃民等款均須徹底根究至米捐如何騷擾以致輿情不協尤當秉公覈辦本日已照李鴻章所請令王文韶馳往湖南署理藩篆卽著李鴻章劉岷督飭該員及臬司李廷樟將

李榕被參各款確切查明據實具奏毋稍含混優人翠喜見在湖南著劉崐派員密速查拏交地方官管押聽候提訊毋任脫逃將此由四百里各諭令知之○李榕革職查辦以王文韶署湖南布

政使

由湖北按察使署

○予陝西陣亡副將王開福遊擊史秀成祭葬世

職○是月豁免江蘇山陽等五縣被擾民欠錢糧暨徐州府海州所屬舊欠額賦浙江蕭山等二縣被水牧地節年租錢蠲緩湖南澧州等十州縣暨岳州衛被水新舊額賦緩徵直隸霸州等四十九州縣歉收新舊額賦租課山東臨清等五十五州縣暨德州等四衛本年額賦並永阜等二場竈地錢糧